

Թէպէտ և Հայք ջանացին միշտ հաստատուն պահել զվաղէմի բարեկամութիւնս իւրեանց, և բազում անգամ 'ի կարեւոր իրս և 'ի դէպս ձեռնտու և օգնական եղեն նոցա մուսացեալ զնեղութիւնս իւրեանց . բայց նոքա վաղ ընդ փոյթ մոռանային զնոսա, և բազում անգամ խօսեցան ընդ Ֆրա Մանուէլ Փոխանորդի նոցին և եղին պայմանս . բայց միաբանք Մենդեան անլսող լեալ բանից նորին, ոչ ընկալան, և պնդէին պատարագել Հայոց զկնի լատինաց . և եղև 'ի բազմանալ վիճմանց՝ հարկ եղև զնալ յերկուց կողմանց՝ 'ի Բեթղէնէ՛մ և կարգաւորել զխնդիրն, որ և Յոյնք յանձն առին կէս ժամ յառաջ կանխել, և որոշեցաւ խնդիրն պայմանագրով՝ 'ի Վլաս Հայոց :

Թէողորոս Պատրիարք ետ գրել զհամառօտութիւն պատմութեան անցից Ս. Տեղեաց, և առաքել առ Եփրեմ Կաթուղիկոս 'ի Ս. Էջմիածին գիտութեամբ Ամիրայից ումանց . զի եթէ արժան դատեցէ, տացէ թարգմանել զայն 'ի Ռուս բարբառ, առաքել 'ի պատշաճաւոր տեղիս, իմանալ թէ Հայք ոչ ինչ առին 'ի ձեռաց Յունաց, այլ քրիստոնէաբար հաւասար եղեն 'ի բաժանորդ տեղիս, (1813 . 'ի 29 Դեկտեմբերի) :

Զկնի տիրելոյ Հայոց հիւսիսային մասին եկեղեցւոյն Բեթղէնէ՛մի՝ բաց յայլոց կարեւոր իրաց արժան էր առ ժամն կանգնել խաչկալս երկուց խորանաց, կազմել դարանս և պահարանս 'ի պահպանութիւն եկեղեցական զարդուց, որպէս հրաման տուեալ էին յառաջագոյն Դատաւորք . այլ յորժամ պատրաստեալ զպահարանն եղին 'ի կողմն յարեւմտից 'ի կամարաձեւ յորմն, 'ի տեղի նախկին դրան եկեղեցւոյ, զայն տեսեալ Յունաց դիմեցին առ Դատաւորն, թէ Հայք առանց հրամանի շինեցին սենեակ յեկեղեցւոյ անդ : Եւ նորա կոչեալ զՀայս խօսի ընդ նոսա կշտամբանօք, և ստիպէ փութանակի բառնալ զայն անտի և փակել զտեղին՝ երկուցեալ 'ի բնակչաց երկրին և 'ի մեծամեծաց Տէրութեան . թէպէտ Հայք ասէին թէ ոչ է այն սենեակ՝ այլ պահարան սակս եկեղեցական զարդուց, և առաքել զմի ոք յիւրոց և իմանալ զստոյզն, և տակաւին փեղկք նորա ոչ էին ագուցեալ, և այլ բազմագլմի բանք . այլ նա ոչ ինչ անսայր բանից նոցա, զնոյն ասէր